

## 每週經課朗誦經文(巴克禮漢羅/教羅)2014/03/23

### 共同經課 - 1

#### 出埃及記十七章一節~七節

1 以色列人全會 thàn 耶和華 ê 命令，照路站，tùi Sin ê 曠野，進前行，tī Li-hui-teng 紮營，百姓無水 thang lim。2 百姓就 kap 摩西計較講：Hō阮有水 thang lim。摩西 kā in 講：Lín 啥事 kap 我計較，啥事試耶和華 ah？3 百姓 tī-hia 真嘴乾，ài lim 水；就哀怨摩西講：你啥事 chhoā 阮 tùi 埃及上來，hō阮 kap 阮 ê kiáⁿ 兒，阮 ê cheng-siⁿ, lóng 嘴乾死 ah？4 摩西就求叫耶和華講：我對 chit-ê 百姓 beh 怎樣做 ah？in 差不多 beh 用石頭 tim 我。5 耶和華 kā 摩西講：你做百姓 ê 頭前行，chhoā 以色列 ê 長老 kúi-nā 人 kap 你去，你 ê 手 tiòh kiáh 前日 phah 河水 ê 拐 á。6 看 ah，我 beh khiā tī 你 ê 面前，tī Hō-liát ê 石磐頂；你 phah hit-ê 石磐，beh 有水 tùi hia 流出 hō百姓 lim。摩西就 tī 以色列長老 ê 面前 án-ni 行。7 伊名 hit-ê 所在叫 Má-sat，koh 叫做 Bì-lī-pa；因為以色列人計較，koh 因為 in 試耶和華，講：耶和華 tī 阮中間 á 無？

### 共同經課 - 2

#### 詩篇九十五篇

1 來 ah，咱 tiòh òng 耶和華唱歌； Òng 救咱 ê 石磐出歡喜 ê 聲。2 咱 tiòh 到伊 ê 面前感謝伊，用詩歌 òng 伊出歡喜 ê 聲。3 因為耶和華是大 ê 上帝，是大 ê 王，贏過 lóng 總 ê 上帝；4 地深 ê 所在 tī 伊 ê 手中；山高 ê 山尖亦屬 tī 伊。5 洋海屬 tī 伊，是伊創造 ê；乾地亦是伊 ê 手造成 ê。6 來 ah，咱 tiòh 鞠躬敬拜；跪落 tī 創造咱 ê 耶和華 ê 面前；7 因為伊是咱 ê 上帝，咱是伊養飼 ê 百姓，是伊手下 ê 羊。今 á 日，lín 若聽伊 ê 聲，8 就 m̄-thang 硬 lín ê 心，親像 tī Bì-lī-pa，親像當日 tī 曠野 ê Má-sat；9 Hit 時 lín ê 祖公試我，驗我，koh 看見我 ê 所做。10 四十年久，我厭恨 hit 世代 ê 人，講，Chiah-ê 是心迷亂 ê 百姓，M̄-bat 我 ê 路；11 所以我 tī 受氣 ê 中間，chiù-choā 講，In 斷斷 boē 得 thang 入我 ê 安歇。

### 共同經課 - 3

#### 羅馬書五章一節~十一節

1 所以咱已經 tùi 信稱做義，就對咱 ê 主耶穌基督有 kap 上帝和；2 也 oá 靠伊，tùi 信來入 tī 現今所 toà ê 恩典，koh òng 望上帝 ê 榮光來歡歡喜喜。3 M̄-nā án-ni，就 tī 患難也歡歡喜喜，因為知患難生出吞忍；吞忍生出老練；4 老練生出 òng 望；也 òng 望無致到見笑；5 因為上帝 ê 疼 tùi 所賞賜咱 ê 聖神來灌 ak 咱 ê 心。6 因為咱 iáu-kú 軟弱 ê 時，基督到期替有罪 ê 人死。7 因為替義人死 ê，oh 得有；替好人死 ê，kiám-chhái 有人敢。8 但是上帝顯明伊本身疼咱 ê 疼痛，因為咱 iáu-kú 做罪人 ê 時，基督替咱死；9 何況咱已經 tī 伊 ê 血得 tiòh 稱做義 beh tùi 伊得 tiòh 救，免得 hit-ê 受氣 ah。10 若咱 iáu-kú 做對敵 ê 時，tùi 伊 ê Kiáⁿ ê 死得 tiòh kap 上帝 koh 和，何況已經 koh 和，beh tī 伊 ê 活得 tiòh 救 ah。11 M̄-nā án-ni，咱現今已經對咱 ê 主耶穌基督得 tiòh koh 和，就對伊也掠上帝做 thang 誇口。

### 共同經課 - 4

#### 約翰福音四章五節~四十二節

5 Tùi án-ni 到撒馬利亞一個城，名叫 Sū-ka，近雅各 hō伊 ê kiáⁿ 約瑟 ê 地；tī hia 有雅各 ê 水井。6 耶穌行路倦，就 án-ni 坐 tī 井邊。Hit 時約略日中晝。7 有一個撒馬利亞 ê 婦人人來 chhiūⁿ 水；耶穌 kā 伊講，請 hō我 lim。8 因為伊 ê 學生已經入城，去買物 thang 來食。9 撒馬利亞 ê 婦人人 kā 伊講，你是猶太人，怎樣 tùi 我撒馬利亞 ê 婦人人討水 lim ah？是猶太人 kap 撒馬利亞人無往來。10 耶穌應伊講，設使你 bat 上帝 ê 恩賜，kap 對你講，hō我 lim ê，是 chī-chhui；你的確求伊，伊就用活水 hō你。11 婦人人講，主 ah，你無 chhiūⁿ 水 ê 器具，井 koh 深；tùi tá-lòh 有 hit-ê 活水 ah？12 阮祖雅各留 chit-ê 井 hō阮，伊家已 kap kiáⁿ 兒 kap cheng-siⁿ lóng lim chit-ê 井 ê 水，你 kiám pí 伊 khah 大 mah？13 耶穌應伊講，Lim chit-ê 水 ê，lóng beh koh 嘴乾；獨獨見若 lim 我所 beh hō伊 ê 水 ê 永遠 boē 嘴乾；14 因為我所 hō伊 ê 水 beh tī 伊 ê 內面成做水泉，直直 chhèng 起來到永遠活。15 婦人人對伊講，主 ah，用 chit-ê 水 hō我，hō我 boē 嘴乾，亦免來 chiah 遠 chhiūⁿ。16 耶穌 kā 伊講，去叫你 ê 丈夫 chiah koh 來。17 婦人人應伊講，我無丈夫。耶穌 kā 伊講，你講，無丈夫，是 tiòh；18 因為你 bat 有五個丈夫；taⁿ 所有 ê m̄是你 ê 丈夫；你 ê 話真正 tiòh。19 婦人人 kā 伊講，主 ah，我看你是先知。20 阮祖 bat tī chit-ê 山敬拜；但是 lín 講敬拜 ê 所在應該 tī 耶路撒冷。21 耶穌 kā 伊講，婦人人 ah，tiòh 信我，時 beh 到 lah，lín 敬拜父亦無 tī chit-ê 山，亦無 tī 耶路撒冷。22 Lín 敬拜 lín 所 m̄知 ê；阮敬拜阮所知 ê；因為拯救是 tùi 猶太人出。23 但是時 beh 到，現今就是，真實敬拜 ê beh 用神用真實敬拜父；因為父是 ài chit 號人敬拜伊。24 上帝是神；敬拜伊 ê 人，tiòh 用神用真實來敬拜。25 婦人人 kā 伊講，我知彌賽亞 teh-beh 到；伊若到 beh 用一切 ê 事 kā 阮講。(彌賽亞翻譯就是基督)26 耶穌 kā 伊講，我 chit-ê teh kap 你講話 ê，就是。27 Hit 時伊 ê 學生到；奇怪伊 kap 婦人人講話；獨獨無人講，你 beh 甚麼 tai-chi？á 是講，你啥事 kap 婦人人講話？28 婦人人隨時放下伊 ê 水瓶，入城，kā 人講，29 來看一人，我平素行 ê 事，伊 lóng kā 我講；chit-ê 總無是基督 ah？30 In 就出城，來就近耶穌。31 當時學生求伊講，拉比來食。32 但是伊 kā in 講，我有米糧 thang 食，lín 所 m̄知 ê。33 學生就 saⁿ-kap 講，Kiám 有人 hō伊食 mah？34 耶穌 kā in 講，行差我 ê ê 旨意，來明白伊 ê 工，就是我 ê 米糧。35 Lín kiám 無講，iáu 有四月日，就收割 ê 時到 mah？我 kā lín 講，kiáh 目看園，已經熟，thang 割 lah。36 收割 ê 人得 tiòh 工錢，積聚五穀到永活；hō掖種 ê，收割 ê，saⁿ-kap 歡喜。37 因為俗語所講，Chit-ê 掖種，hit-ê 收割，tùi án-ni 真正有影。38 我差 lín 收割 lín 所無 tiòh 磨 ê；別人已經 tiòh 磨，lín 享受 in 所 tiòh 磨 ê。39 Hit-ê 城有撒馬利亞人 choē-choē 信伊，是因為婦人人干證，講，我平素行 ê 事，伊 lóng kā 我講。40 Tùi án-ni，撒馬利亞人就近耶穌 ê 時，求伊 kap in toà；伊就 toà hia 兩日。41 因為伊 ê 話來信 ê 人 koh-khah choē；42 kā 婦人人講，阮 taⁿ m̄是對你 ê 話來信；是親身聽見，知伊真正是世間 ê 救主。